

الفصل السادس والخمسون الفكاهي جدا..

كنا سنة أولى كلية عام ١٩٧٠.. وبنلبس شورت وشكلنا جميل وحلو.. بس أقرب للفيران المسلوخة.. وكان أجملنا وأقربنا للطفولة البريئة.. زميلنا المحير والغالي والعزيز.. كنا جميعا بنحبه ونلعب بيه.. ساعات نزهق ويضايقنا ونياس منه.. فنأجره ونرميه..

صاحب هذه السيرة العطرة والطيبة والشفافية.. اللي شارى دماغه من الدنيا.. أخونا الطفل المعجزة.. أيوة جالنا كده.. (محمد فريد موسى شرف).. بيفكرني في شكله وتصرفاته بالممثل الرائع الأمريكي صغير الحجم والذي مثل دور البابي (الطفل الصغير بالبرونة والكفولة وغطاء الرأس المدور والمكشكش زي البرنيطه والمربوط بحبل أو قتله أو دوبارة مربوطة في دقنه عشان ما تقعش) هذا هو عريس الليلة..

إيه المشكلة والمرض والعرض.. والد سيادته والدنا لواء شرطة من أساتذتنا الكبار المرموقين باعته للكلية لغرض واحد.. الإقلاع عن هذا المرض (شراسته للدخان والسجائر حتى لو كانت سبارس).. تمت توصية الضباط وصف الضباط لإحكام هذه التعليمات.. بخطة محكمة وتم الاستعانة فيها بالإنتربول.. وتمت محاصرته في المحاضرات والطواير والحمامات.. والتدريب.. والأكل والنوم والفصول! بأحدث الأجهزة والمعدات المعدنية والبلاستيكية

والبشرية.. وكنت أنا منهم (كمباحث) ومحدث.. حاسس..!..
وكانت جميع هذه الإجراءات تابعة لإدارة مباحث المخدرات..؟
وحبا فيه.. وخوفا عليه.. كان هناك في كل الخطوات فرقة
مكافحة الكيف.. مراقبة ومراقبة له.. بالخوذة والسيف!

يا عيني الواد خرمان.. وعنيه قفلت وجسمه همدان.. وقعد
يهلوس.. ويقول أنا المأمور.. وجاله حول في رجليه.. بدل ما ينزل
الطابور.. يروح الفصول ويرسم على السبور.. صور لسجائر
بتدخينها الطيور.. وكان ماشي في الكلية يصوصو.. كالعصفور! وكل
ما يفلت من كمين.. يلاقي ألف مراقبين!.. طب يعمل إيه في
العيشة الهباب اللي من غير دخان..؟ هداه تفكيره بعد النوم أن
يتسحب وهو صغير الحجم ومش باين.. إنه يروح الحمام ويشرب
سيجارة لأنه على آخره.. وخرمان ويقاله شهرين من غير حس ولا
نفس (سيجارة طبعا).. بس فيه مشكلة بسيطة لكن خطيرة.. كان
سريره جنب سريري على يميني وكان على شمالي عادل عامر..
أنا شفته فر للحمام.. صحيت الشويش عبد الستار وكان حنين
بيخاف علينا وقتله فريد مبقاش وحيد.. يعني إيه.. متصاحب
مع سيجارة في الحمام.. جري الشويش قوام.. ونكد عليه وأخذ
السيجارة وفرم العلبة وقعد يكدر في فريد.. لتاني يوم.. وأنا
سعيد.. عشان حافظت على صحته.. طبعا فريد بقاله شهرين
ووالده اللواء يستلمه من الكلية يوم الخميس تسليم مفتاح من إيده
على الاعتقال بالمنزل لكي يكمل علاجه من الإدمان ويرجعه الكلية
مساء الجمعة بنفس الطريقة يسلمه للشاويشيه..! وذات يوم جمعة

وهو راجع للكلية.. قالي حبيبي أنكل سعيد.. ممكن أطلب طلب..
قول يا هباب.. اوعى تقولي دخان.. لا مش قوي كدا خليك
حين عليا عشان سريرك جنب سريري استر عليا بس في سيجارة
واحدة بس والله حاططها في الكافولة.. وعملها توصيلة بلاستيك
بأنبوبة.. حاشدها بالليل بعد الساعة اتين واحنا نايمين.. وبعدين
معاك.. حاتبوظ العلاج..! والنبي.. والنبي..! آخر مرة يا أبيه
سعيد..؟ واحدة في حياتي بس..! اتفقت مع عادل عامر.. وبدأ
الدخان يتراقص بتمايل وانسجام.. ويتسحب من البطانية فوق
سرير فريد.. كحيت ثلاث مرات ودي الإشارة مع عادل عامر..
فقام كالزنهار في وسط العنبر صائحا حريقة.. حريقة.. الكل..
صحي والشاويشيه قادوا الأنوار وأصبح الليل والعنبر بقى نهار..!
لقوا الدخان فوق سرير فريد وهو مش باين ولا موجود.. شيلنا
البطانية مفيش فريد.. المرتبة.. مش شايفين فريد.. شيلنا الملاية
اللي على الملة الحديد.. لقينا فريد مزنوق بين قوسين.. أقصد
حديتين من ملتين السرير.. ووشه أزرق على كحلي.. وبيموت..
بسرعه أخذت بندقيه من سلاحك العنبر.. وطاخ طيخ في الملة
اتكسرت ووقع فريد بالكفولة والسيجارة والأنبوبة (التوصيلة)
البلاستيك.. وفي فمه عقب السيجارة بيمصمص فيه.. على اللي
جراله واللي حصله.. ما تسالوش.. عشان إنتوا ما بتدفعوش..!
بقيت قصص أخيرة في مدة خدمتي بالإسكندرية.. فكاهية
وغريبة وأول مرة تحدث في فترة قصيرة بحياتي.. (شرارة).